

北京时间：4月27日 22:00

01

胡无人行

剑头利如芒，恒持照眼光。铁骑追骁虏，金羁讨黠羌。
高秋八九月，胡地早风霜。男儿不惜死，破胆与君尝。

02

行路难五首 其四

君不见长安客舍门。倡家少女名桃根。
贫穷夜纺无灯烛。何言一朝奉至尊。
至尊离宫百余处。千门万户不知曙。
唯闻哑哑城上乌。玉栏金井牵辘轳。
丹梁翠柱飞流苏。香薪桂火炊雕胡。
当年翻覆无常定。薄命为女何必粗。

03

酬周参军

日暮忧人起，倚户怅无欢。
水传洞庭远，风送雁门寒。
江南霜雪重，相如衣服单。
沉云隐乔树，细雨灭层峦。
且当对樽酒，朱弦永夜弹。

04

赠王桂阳别诗三首 其二

客子惨无欢，送别江之干。
白云方渺渺，黄鸟尚关关。

纠纷巫山石，合沓洞庭澜。
行衣侵晓露，征舫犯夜湍。
无因停合浦，见此去珠还。

05

同柳吴兴何山集送刘馀杭

王孙重离别，置酒峰之巖。
逶迤川上草，参差涧里薇。
轻云纫远岫，细雨沐山衣。
檐端水禽息，窗上野萤飞。
君随绿波远，我逐清风归。

06

忆费昶诗

皎皎日将上，猎猎起微风。
山没清波内，帆在浮云中。
直趣珠星北，斜开碧海东。
故人若思我，当念离根蓬。

07

赠鲍春陵别诗

落叶思纷纷，蝉声犹可闻。水中千丈月，山上万重云。
海鸿来倏去，林花合复分。所忧别离意，白露下沾裙。

08

览古诗

尝稽真仙道，清淑祕众烦。
秦皇及汉武，焉得游其藩。
既欲先宇宙，仍规後乾坤。
崇高与久远，万物莫能存。
矧乃恣所欲，荒淫伐灵根。
安期反蓬莱，王母还昆仑。

咏云二首 其一

飘飘上碧虚，蔼蔼隐青林。
氛氲如有意，萦郁讵无心。